

Bronislaw Geremek (1932–2008)

El ha manà la Pologna en l'Europa libra

DA GUIU SOBIELA-CAANITZ

■ «La persuna la pli onesta, la pli vardavla e la pli intelligente che jau hai enconuschì:» Quai ha ditg *Lech Walesa*, anteriur manader dal sindicat «Solidarnosc», da Bronislaw Geremek, anteriur minister polac da l'exteriur. En ils onns otganta han il lavurer dal port da Gdansk e l'antieriur professor d'istorgia a l'università cumbattì ensemen il sistem communist introducì a la sumbriva dals tancs sovietics. Ma «Bronek», sco ch'ìls amis al numnavan, era ertavel d'ina Pologna vaira differenta. Ses bab, rabin a Varsovia, era vegnì mazzà ad Auschwitz; il figl aveva savì fugir dal ghetto grazia ad ina largia en il mir. In Polac catolic l'ha lura zuppentà ed ha pli tard maridà la vaiva dal rabin. Sco creschì ha Geremek l'emprim cartì ch'il communissem saja la dretga via. Lur ha'l chapì ses sbagl; suenter l'invasiun da Tschecoslovachia 1968 è'l vegnì in adversari persvas e radical dal reschim. 1981 ha general Wojciech Jaruzelski decretà il dretg da guerra; Geremek è stà in onn e mez en praschun. Suenter la victoria electorala da «Solidarnosc» (zercladur 1989) è'l vegnì president da sia fracziun en il parlament naziunal e da



Bronislaw Geremek.

la cumissiun da politica exteriura; quest svilup en Pologna ha pinà l'avertura dal cunfin ungarais en settember e la fin dal mir da Berlin en november.

El lascha enavos ina largia

1997–2000 è Geremek stà minister da l'exteriur. Sco tal ha'l survegnì 1998 il Premi internaziunal Carl da la citad d'Aachen, veglia chapitala da Carl il grond († 814). Suenter l'adesiun da ses pajais a l'Uniun europeica (UE) 2004, è'l vegnì commember dal parlament europeic. Gia 2002 ha'l referì ad Expo 02 ad

Yverdon-les-Bains. Il schurnalist romannd *Jacques Pilet** sa regorda: «Là avainsa preschentà in film davart ils pajais da l'Ost pronts per l'adesiun a l'UE. Ins veseva in pur polac davos ses char e ses chaval. Geremek è vegnì grit a moda amiaivla: ,Vus mussais mo in stereotip da nus. Vus vesais il Polacs sco povers schanis che chavan tartuffels or d'in terratsch schelà' (...). El ha crittigà l'ignoranza da l'Occident areguard in entir toc da l'Europa. (...). Jau ma regordel d'ina discussiun a Varsovia, in mais suenter l'entschatta da la guerra en l'Irac. Geremek l'approvava sco ina speranza da progress vers la libertad. Igl è stà ina confrunziun dira. Trais onns pli tard ha'l reconuschì ses sbagl (...). El deplorava ch'ins audia uschè pauc en il mund l'Europa, ferma grazia a sia cultura multifara.» Geremek è mort ils 13 da fanadur. Pilet: «El lascha enavos ina vaira largia. I manca persunalitads en l'Europa (...). Chau da stadis (...) èn praschuniers da lur visiuns naziunalas e surdumandads en fatscha a l'agitaziun dal mund (...). L'Europa balsegna in document fundamental che mettia en evidenza il senn dal project.»

* **Jacques Pilet, L'Europe d'après Geremek. En: «L'Hebdo», 17 da fanadur 2008, p. 60, Losanna.**